



Regione Autònoma de Sardigna




Unione Comunes de Piana

Ufitziu de sa Limba Sarda

(Attività finanziate con la Legge 482/99)

MARIA GIOVANNA SERCHISU



Sos meràculos de Padre Pio bortados in sardu

Su meràculu de sa castàngia

Est de su 1908 e est unu de sos primos meràculos de Padre Pio. Essende in su cunventu de Montefusco, Padre Pio pensat de andare a regòllere unu sachitu de castàngia pro nche la mandare a sa tzia Dària, a Pietrelcina, chi lu cheriat bene meda. Cudda fèmina retzit sa castàngia, si nche la màndigat e regollet su sachitu pro ricordo. Unu pagu de tempus a pustis, unu sero, faghende si lughe cun una làmpana a ozu, Tzia Dària andat a forrogare in unu calàssiu in ue su maridu bi teniat sa brùvera. Un'ischintidda faghet partire su fogu e su calàssiu iscòpiat imbestende sa fèmina in cara. Aboghinende pro su dolore tzia Dària nde leat dae su comò su sachitu in ue bi fiat istada sa castàngia de Padre Pio e si lu ponet in cara, pro chircare de alleviare sa brusiadura. Luego li passat su dolore e in sa cara de sa fèmina non b'abarrat perunu segnale de sa brusiadura.

Su meràculu de su pane ratzionadu

In tempus de gherra su pane fiat ratzionadu. A su cunventu de Santa Maria de sas Gràzias acudiat semper prus gente, e sos pòberos chi andaiant a pedire fiant semper prus. Una die, cando sos padres imbatent a refetòriu pro mandigare, in su cestinu b'aiat mesu chilu de pane ebbia. Sa comunidade pregat e a pustis si setzint a mesa pro mandigare sa minestra. Padre Pio fiat abarradu in crèsia. Paga ora a pustis arribat cun paritzos filones de pane modde. Su Superiore li narat: “E in ue l'as leadu?” – “Mi l'at dadu una pellegrina in sa gianna”, rispondet Padre Pio. Niunu narat nudda, ma totu aiant cumpresu chi issu ebbia podiat atopare tzertos pellegrinos.

Unu mangianu su giòganu si fiat ismentigadu de fàghere cunsagrare sas òstias pro sa comunione. In sa pìsside bi nd'aiat abarradu pagas meda. Cando finit de cunfessare Padre Pio comintzat a dare sa comunione, e b'aiat gente meda. Los cumìnigat totu e in sa pìsside b'addurant fintzas òstias. Unu meràculu!

Su meràculu de su silèntziu

In s'ortu de su cunventu b'aiat giomprexis, àrbores de fruta e carchi opinu. In s'istiu Padre Pio, a sero, istaiat in s'umbra de custas àrbores cun sos amigos e cun carchi bisitadore, in circa de friscura. Una die, in su mentres chi Padre Pio fiat chistionende cun carchi persone, unu muntone de pugiones, chi fiant in sas naes prus artas de sas àrbores, comintzant a si mòvere e a fàghere burdellu meda. Pugiones de onni genìa comintzant a cantare totu paris. Ma cussa mùida dat infadu a Padre Pio chi àrtziat sos ogros a cara a in artu e cun su pòddighe a dae in antis de sas lavras, narat: “Como bastat!” - Sos pugiones, sos grillos e sas chigulas luego si càlliant a sa muda. Non s'intendet prus mancu unu piulu! Sa gente abarrat ispantada meda. Padre Pio, comente Santu Frantziscu, aiat faeddadu a sos pugiones.

Su meràculu de s'abba buddida

Una fèmina narat custu contu: “In su 1953 est nàschida sa prima figia mia chi cando teniat un'annu e mesu est istada sarvada dae Padre Pio. Su mangianu de su 6 de ghenàrgiu de su 1955, cando deo e maridu meu nche fiamus in sa Missa, sa pitzinna, chi fiat in domo cun sos giamos e cun unu tziu, nche ruet in una caldaja de abba buddida. Si fiat brusiada meda. Deo assora aia suplicadu a Padre Pio de sarvare sa pitzinna. Su dotore, chi fiat bènnidu a pustis de un'ora e mesa, aiat cussigiadu de nche la leare a s'ispidale ca timiat chi s'esseret morta. Pro tantu non l'aiat dadu peruna meighina. Cando si nche fiat andadu su dotore, deo comintzo a invocare a Padre Pio. In su mentres chi mi fìa preparende pro andare a s'ispidale, fiat giai mesudie, sa pitzinna chi fiat sola in s'apostu suo, mi cramat: “Mama, sa brusiadura no la porto prus!” – “E chie ti nde l'at leada?”, pregunto ispantada. E issa mi narat: “Est bènnidu Padre Pio. M'at postu sa ferida de sa manu sua subra sa mia”. In su carenadu de sa pitzinna, chi pro su dotore fiat giai morta, non b'aiat sinnale perunu de brusiadura.

Sa gràtzia de unu fradigheddu preannunziada dae sa visione de su santu dae una pitzinna chi arriscaiat de abarrare a sa sola

«Mugere mia Andrea e deo amus fatu pro bator annos una cura pro pòdere tènnere figios. (...) In ùrtimu, in su 2004, est nàschida figia nostra Delfina María Luján. Tres annos a pustis, cuntentos ca fiat pro arribbare un'àteru figiu, Andrea l'at pèrdidu. Est istadu unu corpu malu meda. (...) Semus andados a Salta, a Tres Cerritos, in ue prus de 60.000 persones si riunint pro nàrrere su Rosàriu in onore de s'Immaculada Mama de su Coro Eucaristicu Divinu de Gesùs (...) E gasi bio chi sorre mia María, chi fiat tzeraca in su tzentru, nde bogat dae bussaca una carta de Padre Pio e la dat a Andrea pro lu pregare. Torrende a domo, Delfina, chi teniat tres annos e mesu ebbia, in biàgiu nos narat chi at bidu unu padre a dae segus de s'àrbore in ue si fiat sètzida sa mama. No amus postu cabu a cussu fatu, pensende chi esseret una fantasia típica de una pitzinna de cussa edade. Ma a pustis, narende su contu a sorre mia Maria, custa nos narat chi gente meda aiat bidu a Padre Pio pròpriu a canta a sa matessi àrbore. (...) Sas pregadorias nostras a su Santu de Pietrelcina sunt istadas iscurtadas in presse, ca su mese a pustis amus ischidu chi Andrea isetaiat torra unu pitzinnu. Sa data probàbile de su partu depiat èssere su 23 de cabudanni. Sa matessi die chi est mortu Padre Pio. Amus detzisu chi, si esseret istadu unu pitzinnu òmine, l'aimis postu Pio; e, in casu chi esseret istada una pitzinna fèmina, Pia. (...) Sigomente Pio Santiago est nàschidu sa prima die de austu, amus detzisu de lu batijare su 23 de cabudanni, in sa crèsia de San Pio, in La Plata. A pustis, amus mandadu una còpia de sa registratzione de sa tzerimònia a San Giovanni Rotondo, pro ringraziamentu».

Su meràculu de sa mèndula

Fiat beranu, sas àrbores de sa mèndula froridas promitiant un'annada bona ma, a s'improvisu, imbatet sa ruga-ruga. Meda! Unu disisperu! Si nche màndigat totu, fògias e frores. A pustis de duas dies, a pustis de àere tentadu de firmare cussu fragellu, sos meres (chi pro meda de issos sa mèndula fiat s'ùnica resursa econòmica) nde faeddant cun Padre Pio. Issu, dae sa frenesta de su cunventu dae in ue si bient sas àrbores, biet cussu dannu e detzidet de beneìghere sas

àrbores. Si ponet sa cota e s'istola e comintzat a pregare. Finidas sas oratziones, leat s'abba santa e faghet in s'ària una rughe manna in diretzione de sas àrbores. S'incràs sa ruga-ruga nche fiat totu isparida, ma sas àrbores nudas pariant fustes de linna e duncas si cumprendiat chi pro cussu annu non diant àere bidu mancu una mèndula! E imbetzes... Cussu annu aiant regortu mèndula meda, meda, comente mai in antis de assora! Ma comente ant fatu àrbores chena froes a dare frutu? Comente ant pòdidu dare frutu cussos fustes de linna fichidos in terra? Sos espertos e sos istudiosos de botànica no ant mai ischidu rispòndere a custa pregunta.

Su meràculu de sa die de Pasca

Una fèmina de San Giovanni Rotondo, Paolina, una de sas ùrtimas dies de sa Carèsima s'ismalàidat e est grave meda. Sos dotores narant chi non b'at prus nudda de fàghere. Assora su maridu e sos chimbe figios andant a su cunventu de Padre Pio. Sùplicant a Padre Pio de la sanare. Sos duos pitzinnos prus piticos s'atacant a s'àbidu de su padre pranghende. Padre Pio est dispràghidu meda pro custa situatzione, los consolat e lis promittit chi at a pregare. Sas dies de sa Chida Santa, a chie li domandat de fàghere carchi cosa pro sanare a Paolina, Padre Pio rispondet: "At a resuscitare sa die de Pasca". Sa Chenàbura Santa Paolina perdet connoschèntzia, e su mangianu de su Sàbadu Santu intrat in coma. A pustis de carchi ora est firma, morta. Carchi parente la bestit cun su bestire de isposa, segundu s'usàntzia de sa bidda, àteros current, disisperados, a su cunventu. Padre Pio repitit: "At a resuscitare...". E andat a s'altare a nàrrere missa. Cando intonat su Glòria, cando su sonu de sas campanas annùntziat sa resurretzione de Gesùs, sa boghe de Padre Pio si blocat e sos ogros suos si prenant de làmbrigas. In cussu matessi momentu Paolina resùscitat. Sena agiudu perunu si nde pesat dae su letu e a boghe arta narat tres bortas su "Credo". Posca faghet unu sorrisu. Est unu meràculu! Padre Pio aiat naradu "At a resuscitare" e no "At a sanare"! Cando li preguntant ite l'at sutzessu in su tempus chi fiat morta, Paolina narat: "Pigaia, pigiaia,

cuntenta...cando fia intrende in una lughe manna so torrada in segus..., so torrada a giosso...”. E posca non narat àteras cosas.

Su meràculu de sa fèmina sanada dae sa nefrite

Un’òmine de Canicattì narat: “A primos de su 1953, a mugere mia giai dae sos primos meses chi isetaiat su pitzinnu, li benit una forma grave de nefrite. Sos doctores narant chi sunt in perìgulu issa e su pitzinnu. Non li faghiat bene cura peruna. Su 3 de maju, disisperadu, iscrio una litera a Padre Pio pro li domandare de pregare. A pustis de carchi die, siat deo che mugere mia, in su matessi momentu ma in aposentos diversos, intendimus unu fragu ispantosu de rosas. In cussu matessi momentu pìchiat a sa gianna su postinu e nos cunsignat una lìtera chi benit dae su cunventu de San Giovanni Rotondo e narat chi Padre Pio diat àere pregadu pro mugere mia e pro su pitzinnu. S’incràs, cando mugere mia faghet un’àteru esame, li narant chi sa nefrite nch’est isparida e chi issa est sanada cumpletamente.”

Su meràculu de sa lìtera dae su fronte

Signora Cleonice, figia ispirituale de Padre Pio, narat custu contu: “In s’ùrtima gherra, nebode meu est fatu presoneri. Non retzimus novas pro un’annu. Totu pensaimis chi fiat mortu. Sos genitores fiant disisperados. Una die sa mama si nche betat a pees de Padre Pio chi fiat in su cunfessionale. “Narade.mi si figiu meu est biu. Deo non mi nde frango dae inoghe si non mi lu narades”. Padre Pio si commovet meda e li narat: “Pesadi.nde e bae tranquilla”. Carchi die a pustis, su coro meu non podiat intèndere prus su prantu disisperadu de sos genitores, detzido de domandare unu meràculu a Padre Pio e cun fide manna li naro: “Padre, deo iscrio una lìtera a nebode meu Giovanninu, cun su nùmene ebbia ca no isco a in ue la mandare. Vostè e s’Ànghelu de sa Guàrdia de Vostè leade·nche·la a in ue est issu. Padre Pio non rispondet. Deo iscrio sa lìtera e la

lasso, in antis de mi nche corcare, subra su comodinu. S'incràs mangianu m'acato cun ispantu chi sa lìtera non b'est prus. Assora ando, cummossa, a ringratziare a Padre Pio e issu mi narat: "Ringrätzia a Nostra Signora". A pustis de una bindighina de dies in famìllia si pranghiat pro sa cuntentesa, si torraiant grätzias a Deus e a Padre Pio: fiat arribada sa lìtera de risposta a sa mia dae cuddu giòvanu chi pensaimis chi fiat mortu. Unu meràculu!

Su meràculu de s'abba chi no sensat

Un'ingennieri, unu sero, chi si fiat tratesu ora meda in su cunventu, cando fiat pro si nch'andare s'acatat chi est proende meda. "E deo so sena paracu – narat a Padre Pio – non potzo abarrare inoghe finas a cras? Si nono m'apo a infùndere comente unu puddighinu!" – "Nono, figiu meu, non faghet. Ma non times, abarra trancuillu chi t'apo a acumpangiare deo". Tando s'ingennieri si nch'àrtziat su collete de su capoto, si ponet su capellu e si preparat a s'incaminare a pè, a cara a sa bidde, pro duos chilòmetros. Cando nch'essit a foras s'ispantu est mannu, ca s'acatat chi su dilùviu si fiat calmadu meda e fiat rosinende ebbia. Cando imbatet a domo de sa famìllia chi l'aiat afitadu s'apostu, sa fèmina apenas chi lu biet narat: "Nostra Signora mia, aias a èssere infustu finas a s'ossu!" E cuddu rispondet: "No, no, est rosinende ebbia". Sa fèmina e su maridu s'abbàidant ispantados e narant: "Comente, rosinende? Est unu dilùviu, iscurtade!" S'acredant a foras e bient chi est proende pro pròere. "Est proende meda dae un'ora, comente ais fatu a nd'imbàtere assutu?" – "Padre Pio at naradu chi m'acumpangiaiat" – "Ah, beh, si Padre Pio at naradu gasi..." – E cando si setzent a mandigare unu bellu pratu de minestra cheghente, sa fèmina narat: "De seguru sa cumpangia de Padre Pio balet prus de totu sos paracos de su mundu!".